

BERITA ONLINE
DAGANG NEWS
TARIKH: 16 JUN 2022 (KHAMIS)



TERKINI - 16 Jun 2022 05:15 PM



PPIM, Crescent Digital lancar aplikasi YAKIN perkasa usahawan, pengguna Islam era digital



Datuk Seri Dr. Adham Baba (empat dari kiri) ketika melancarkan aplikasi YAKIN. Turut kelihatan, Datuk Nadzim Johan (empat dari kanan) dan Nina Alyssa Zainal (dua dari kiri)

KUALA LUMPUR 16 Jun - Persatuan Pengguna Islam Malaysia (PPIM) berkolaborasi dengan Crescent Digital Sdn Bhd (Crescent Digital) untuk membangunkan dan mengendalikan aplikasi mudah alih rasmi dalam talian PPIM yang dikenali sebagai YAKIN.

Menerusi aplikasi YAKIN yang sudah pun sedia untuk dimuat turun secara percuma, pengguna-pengguna boleh menjadikan aplikasi YAKIN sebagai 'one stop centre' untuk mendapatkan pelbagai perkhidmatan yang ditawarkan oleh PPIM.

Perkhidmatan itu melibatkan aduan hal ehwal pengguna, bantuan mangsa ah long atau ceti haram, sumbangan derma kepada saluran sahih dan berdaftar serta sebagai informasi paling terkini PPIM dari telefon pintar pengguna.

Turut disediakan dalam Modul Ibadah aplikasi tersebut adalah waktu solat, kiblat, doa harian, tasbeih dan pelbagai lagi.

Dalam pada itu, Menteri Sains, Teknologi dan Inovasi, Datuk Seri Dr. Adham Baba berkata, beliau mengalunkan inovasi ke arah digital dari PPIM dan Crescent Digital.

"Inisiatif untuk membina aplikasi ini dalam Bahasa Melayu adalah langkah yang sangat tepat demi memartabatkan bahasa tersebut sebagai bahasa kebangsaan.

"PPIM juga mempunyai jumlah pengikut media sosial yang ramai dalam kalangan masyarakat Muslim di Malaysia iaitu lebih daripada 1.5 juta orang merentasi 5 platform media sosial. Justeru, aplikasi YAKIN berkemampuan menjadi aplikasi gaya hidup Muslim tempatan yang utama dan paling komprehensif bukan sahaja di Malaysia malah di rantau ini," katanya selepas pelancaran aplikasi itu.

Presiden dan Ketua Aktivis PPIM, Datuk Nadzim Johan pula berkata, aplikasi itu bukan sahaja menyasarkan pengguna, malah dibangunkan dengan matlamat untuk membantu perniagaan-perniagaan yang ingin mempromosikan produk atau perkhidmatan mereka secara khusus dan efisien kepada kumpulan pengguna Islam dan bukan Islam.

"Perlu juga ditegaskan bahawa kempen-kempen derma yang terdapat di dalam aplikasi YAKIN telah disemak dan disahkan terlebih dahulu oleh pihak kami.

"Bagi pihak PPIM, kami yakin bahawa aplikasi ini dapat memberi manfaat kepada semua rakyat Malaysia bersesuaian dengan misi PPIM sendiri iaitu melaksanakan tuntutan fardhu kifayah yang membabitkan kepentingan pengguna dan perniagaan Islam melalui tindakan proaktif dan berstrategi," katanya.

Ketua Pegawai Eksekutif Crescent Digital, Nina Alyssa Zainal berkata, kolaborasi PPIM bersama pihaknya yang menyediakan khidmat transformasi digital dengan tumpuan khusus pada ekonomi digital Islam adalah amat tepat.

"Selain daripada ciri-ciri yang telah disebutkan, kami juga sedang merancang untuk memperkenalkan pelbagai lagi fitur di dalam aplikasi YAKIN merangkumi direktori perniagaan Islam, direktori scammers, tinjauan atau survey, e-Dagang dan lain-lain di fasa akan datang," katanya.

Aplikasi YAKIN dimuat turun secara percuma di Google Play Store, App Store dan Huawei AppGallery untuk semua telefon pintar Android dan iPhone. - DagangNews.com